

car la paxe e liga fata con la Maestà Christianissima dil re di Franza, prima su la note conzato la faza' dil palazzo verso le hostarie con tapezarie, cossa bellissima a veder, et postovi arme dil re di Franza, San Marco et dil Doxe, con stendardi fuora di doxi e capetanii zenerali; et quali fonno, sarà notadi qui. *Etiam* la faza' di la chiezia di San Marcho di sora da le colonele fu adornata di panni d'oro et simeli stendardi, che pareva molto bon; et era un degno spettacolo. Atorno la Piazza posto li pani sopra le antenele per schivar il sol a la processione. In chiezia di San Marco adornato il coro degnamente et li apostoli e atorno la † vestiti con pianee d'oro e di seda, e cussi le colone dil coro; et acciò sia memoria, voglio notar prima li stendardi, et a la faza' dil palazzo erano questi per hordine:

Di sier Bortolamio Zorzi, fo provedador in armada.

Di sier Domenego Malipiero, fo provedador in armada.

Di sier Cristofal Moro Doxe, quando fo capitano zeneral in Ancona.

Di sier Giacomo Loredan, fo capitano zeneral di mar.

Dil serenissimo missier Pasqual Malipiero, fo Doxe.

Dil serenissimo missier Agustin Barbarigo, fo Doxe.

Dil serenissimo missier Francesco Foscari, fo Doxe.

Dil re Zacho de Cypri.

Di sier Piero Loredan, fo capitano zeneral di mar.

Di sier Giacomo Marzelo, fo capitano zeneral di mar.

Dil serenissimo missier Andrea Vendramin, fo Doxe.

Dil serenissimo missier Piero Mozenigo, fo Doxe.

Dil serenissimo missier Zuan Mozenigo, fo Doxe.

Dil serenissimo missier Marco Barbarigo, fo Doxe.

Di sier Marchiò Trivixan, fo capitano zeneral di mar.

Sopra la faza' di la chiezia.

Di sier Hironimo Pixani, fo provedador in armada.

Di sier Piero Zivran, fo capitano a l'impresa di Zara.

Di sier Simon Guoro, fo provedador in armada.

Di sier Antonio Grimani, fo capitano zeneral di mar.

Di sier Nicolò da Canal, fo capitano zeneral di mar.

Di sier Piero Mozenigo, fo capitano zeneral di mar.

Dil serenissimo missier Michiel Morexini, fo Doxe.

Dil serenissimo missier Christofal Moro, fo Doxe.

Di sier Francesco di Prioli, fo capitano zeneral di mar.

Di sier Francesco di Prioli ditto, uno altro.

Di sier Hironimo Contarini, fo provedador in armada, *Grilo*.

Et altri erano:

147*

Dil serenissimo missier Lunardo Loredan, principe presente.

Di sier Antonio Loredan, fo capitano zeneral di mar.

Manchava questi:

Dil serenissimo missier Nicolò Trun, fo Doxe.

Di sier Vetur Capelo, fo capitano zeneral di mar, è a Santa Lena.

Di sier Vetur Soranzo, fo capitano zeneral di mar.

Dil serenissimo missier Nicolò Marzelo, fo Doxe.

Di sier Beneto da cha' da Pexaro, fo capitano zeneral di mar.

Et venuti li oratori et patricii in Gran Consejo reduti, si vene zoso per la scala di piera di le prexon, et per esser a bona ora, veneno atorno il palazzo per veder l'aparato facto, con trombe di bataia avanti et le trombe e pifari dil Doxe, et introno in chiezia. Il Principe vestito di restagno d'oro; domino Petro di Bibiena orator dil Papa con cadena d'oro; domino Costanzo orator dil re di Franza con cadena d'oro, et domino Filippo Moro orator di Hongaria. Poi seguiva domino Giacomo Stafer capitano di sguizari, tornato di Roma, con una cadena d'oro al colo et una chiave granda d'arzeno in la bareta. Era poi altri, come dirò di soto. Domino Thodaro Triulzi, che vene orator di Franza, andò in campo con il signor Bortolamio e però non vi fue. Era *etiam* tre altri capi di sguizari ben vestiti con dito Stafer venuti. Et prima: il primocierio di San Marco, el Zane vescovo di Brexa et l'abate domino Andrea Mozenigo; poi li consieri e procuratori numero 5, sier Antonio Grimani, sier Nicolò Michiel, sier Antonio Trun, sier Thomà Mozenigo e sier Domenego Trivixan cavalieri vestiti d'oro di restagno; sier Alvixe Mozenigo e sier Andrea Trivixan e altri di seda; sier Hironimo Barbaro com manege dogal fodrà d'oro; sier Gabriel Moro con becho d'oro; sier Piero Pasqualigo con manto damaschin cremexin e vesta d'oro sotto; il resto di senatori, il forzo, *adeo* di 108 che erano in tutto, vi fu 77 veste tra d'oro e di seda; ma molte di veludo cremexin e alto basso e di veludo negro damaschin cremexin et di altra sorte seda e veludo paonazo: il resto scarlato tutti a manege dogal, che fo bellissima cossa a veder tal Senato. Et